



REPUBLIKA E SHQIPËRISË

KUVENDI

Komisioni Ad Hoc për Verifikimin e Kandidatëve

PROCESVERBAL

Tiranë, më 25.05.2017, ora 12:00

Drejton mbledhjen:

Ulsi Manja - kryetar i Komisionit

Rendi i ditës:

1. Miratimi i kalendarit për zhvillimin e seancave dëgjimore publike me kandidatët.
2. Miratimi i datës së përcjelljes së listës për votim komisioneve përzgjedhëse.

Marrin pjesë:

Ulsi Manja, Flamur Noka, Vasilika Hysi, Oerd Bylykbashi dhe Fatmir Mediu.

Mungon:

Luan Rama

HAPET MBLEDHJA

Ulsi Manja – Mirëdita dhe ju kërkoj ndjesë për vonesën!

Meqenëse është plotësuar kuorumi, fillojmë mbledhjen e dytë të komisionit ad hoc “Për rivlerësimin kalimtar të gjyqtarëve dhe prokurorëve në Republikën e Shqipërisë”.

Komisioni në rendin e ditës sot ka dy pika:

Miratimin e kalendarit për zhvillimin e seancave dëgjimore publike me kandidatët që nuk i plotësojnë kriteret formale dhe që nuk janë vlerësuar me rekomandim negativ nga ONM-ja; kandidatët që i plotësojnë kriteret formale, por që janë vlerësuar me rekomandim negativ nga ONM-ja; si dhe kandidatët që nuk i plotësojnë kriteret formale, por që kanë marrë një vlerësim negativ nga ONM-ja, sipas listës bashkëngjitur në dokumentacionin e paraqitur nga Sekretariati Teknik, të cilin kolegët e kanë mbi tavolinë.

Propozohet që komisioni të zhvillojë seanca dëgjimore me kandidatët në dy data. Në datën 29.05.2017, ora 10:00 komisioni do të zhvillojë një seancë dëgjimore me grupin e kandidatëve që i plotësojnë kriteret formale dhe që nuk janë vlerësuar me rekomandim negativ nga ONM-ja. Pra, grupi i parë i seancës dëgjimore do të zhvillohet me kandidatët që i plotësojnë kriteret formale dhe që nuk janë vlerësuar me rekomandim negativ nga ONM-ja dhe me kandidatët që i plotësojnë kriteret formale, por që janë vlerësuar me një rekomandim nga ONM-ja. Pra, do të jenë dy lista: në listën A do të jenë kandidatët që i plotësojnë kriteret formale, por që janë vlerësuar me rekomandim negativ nga ONM-ja dhe në listën B do të jenë kandidatët që kanë marrë një vlerësim pozitiv nga ONM-ja, por që nuk i plotësojnë kriteret formale.

Grupi i dytë i kandidatëve janë ata, të cilët nuk i plotësojnë kriteret formale, por që janë vlerësuar negativisht nga ONM-ja.

Kjo seancë dëgjimore është në respektim të nenit 8 germa “c” të Kushtetutës, nenit 8 të ligjit “Për vlerësimin kalimtar të gjyqtarëve dhe prokurorëve”, si dhe të vendimit nr. 40/2017 të Kuvendit të Shqipërisë, i cili në nenin 8 përcakton procedurat parlamentare për funksionimin e komisioneve ad hoc dhe realizmin e procesit të votimit sipas ligjit nr. 84/2016 “Për rivlerësimin kalimtar të gjyqtarëve dhe prokurorëve në Republikën e Shqipërisë”.

A jeni dakord me këtë kalendar?

Oerd Bylykbashi – Zoti kryetar, ky është Komisioni Parlamentar Ad Hoc për Verifikimin e Kandidatëve. Pra, ne jemi komisioni që do të marrë në shqyrtim kandidaturat e aplikuarra për këtë proces dhe që kanë kaluar në dy filtra aktualisht, tek Avokati i Popullit dhe

tek ONM-ja. Gjithashtu, ne kemi tagrin që vendimet e tyre t'i kthejmë pas me 4 vota në rastin kur dikush është s'kualifikuar nga Avokati i Popullit dhe me 5 vota kur kanë marrë rekomandim negativ, sepse sipas ligjit nuk hyjnë në listë nga ONM-ja. Pra, ky është një komision , i cili ka një kompetencë shumë të qartë në hartimin e listës finale. Po kështu, neni 8 i ligjit në pikën 5 parashikon që ne e kalojmë në seancat e komisioneve të tjera listën e kandidatëve të cilët plotësojnë kriteret, që do të thotë se duhet të kemi kujdes për të parë që të gjithë kandidatët që do të shkojnë në votimin e komisioneve që do të bëjnë punën pas nesh, të plotësojnë kriteret formale, duke prezumuar tani, që Avokati i Popullit e ka bërë punën siç duhet, por duke pasur mundësinë që ta shqyrtojmë këtë punë dhe, që gjithashtu, kjo do të dalë edhe nga seancat e tjera dëgjimore. Kështu që, nuk ka asnjë gjë të këtillë, që komisioni ynë duhet të verifikojë vetëm ata që janë të skualifikuar, pra që janë konsideruar si kandidatë që nuk plotësojnë kriteret formale nga Avokati i Popullit. Po kështu, jo vetëm ata që kanë marrë një rekomandim negativ nga OMN-ja, ne do të shohim edhe kandidatë të tjerë. Është detyra jonë që kur të çojmë një listë, të jetë me kandidatë që plotësojnë kriteret. Kështu e ka titullin ky nen, “Komisioni Parlamentar për Verifikimin e Kandidatëve”.

Gjithashtu, për procedurë, është një kërkesë imja, besoj se i bashkëngjiten edhe kolegë të tjerë, uroj të gjithë ne. Siç e dini të gjithë, ky proces ka kaluar në dy faza, në një fazë të ligjshme dhe në një fazë, nuk po themi të paligjshme, por ishte minimumi ekstra-ligjore, ku pavarësisht se kaluan afatet (një gjë e pangjarë më parë), u krijuan afate dhe procedura, dhe iu dha mundësi kandidatëve të cilëve u kishte ikur afati të plotësonin dokumente etj.

Kështu që, është e nevojshme që për të pasur një gjykim të saktë të kemi të gjithë dokumentacionin shtesë, atë për të cilin të gjithë ata që u skualifikuan, sollën, plotësuan dhe i mbushën mendjen Avokatit të Popullit, apo kujt do tjetër, për të qenë pjesë e kësaj liste. Herën e parë nuk ishin, herën e dytë janë.

Për hir të transparencës për këdo, duke qenë se deri në këtë pikë transparenca ka qenë shumë e pakët, për kandidatët kryesisht, por edhe për publikun, duhet të kemi këtë diferencë dokumentacioni, listën e këtyre që u maturuan në këtë periudhë *interim*, dhe se me çfarë u maturuan, në mënyrë që ky komision të bëjë gjykimin më të saktë të mundshëm.

Më pas, sigurisht, mund të ketë ndonjë propozim në lidhje me mënyrën se si do të kompozohet edhe grupin e atyre që do të bëjnë seancë dëgjimore me ne, sepse mund të ketë nga ata që e dinë që janë të skualifikuar dhe nuk duan të vijnë më në seancë dëgjimore. Për efekt kohe mund të ketë një propozim për më mirë.

Faleminderit!

Vasilika Hysi – Faleminderit, zoti kryetar!

Në radhë të parë, lidhur me seancën dëgjimore ligji e përcakton qartë në nenin 8, ku thuhet: “Komisioni ad hoc, pas zhvillimit të një seance dëgjimore me kandidatët, vendos vetëm për dy gjëra, e para, kandidatët të cilët nuk plotësojnë kriteret formale mund të kalojnë me 4 vota dhe kandidati që është në listën e kandidatëve të rekomanduar negativisht nga OMN-ja, të kalojë në listën për votim me 5 vota”.

Neve nuk na lejohej të bëjmë rishikim të listës që ka sjellë Avokati i Popullit, ku thuhet se ka plotësuar kriteret formale dhe se nga verifikimi që ka bërë OMN-ja rezulton përsëri që i kanë kriteret formale. Këtë e thotë qartë përsëri neni 8 i ligjit, në paragrafin 4, ku thuhet që: “Lista për votim, (pra lista që ne si komision verifikimi do të çojmë te dy komisionet e tjera) do të përmbajë kandidatët të cilët plotësojnë kriteret formale, përveç atyre që janë në të dyja listat e tjera”, për të cilat ne nuk kemi vendosur me votim, t’i kalojmë apo mos t’i kalojmë.

Nga ana tjetër, të nderuar kolegë, do të doja të sillja në vëmendjen tuaj që kemi edhe një Rregullore të miratuar me vendim të Kuvendit, ku në nenin 8 të saj, thuhet, “Procesi i votimit”, dhe që në fillim thuhet: “Me çfarë do ta fillojë punën komisioni?”

“Komisioni ad hoc, (thuhet në paragrafin e parë të nenit 8), pas zhvillimit të një seance ose të seancave dëgjimore me kandidatët, me propozim të një anëtarit të tij, mund të kalojë një kandidat nga lista e kandidatëve që nuk plotësojnë kriteret formale, te lista e kandidatëve që plotësojnë kriteret formale me të paktën 4 vota”.

Pika 2, thotë: “Pas përfundimit të votimit të emrave të kandidatëve të listës, sipas pikës së parë, (pra pasi të kemi bërë intervistën e kandidatëve që nuk plotësojnë kriteret formale dhe ne themi që me 4 vota nuk do të kalojë asnjë te lista tjetër), do të kalojmë te lista e dytë që është lista e kandidatëve që Operacioni Ndërkombëtar i Monitorimit ka rekomanduar”, sepse ata nuk vendosin, por na kanë rekomanduar negativisht, dhe nëse ne me 5 vota themi që kandidati *a*, pas dëgjimit të intervistës duhet të kalojë, dhe këtë e kërkoi njëri nga ne, se në qoftë se nuk e kërkojmë nuk kemi pse ta votojmë, e ka të qartë Rregullorja e Kuvendit, vetëm atëherë ne e votojmë.

Nga ana tjetër, mos harroni që intervista do të bëjnë dy komisionet e përzgjedhjes. Të dy komisionet, si komisioni që do të zgjedhë anëtarët e Kolegjit të Apelimit, si komisioni që do të përzgjedhë anëtarët e Komisionit të Pavarur të Kualifikimit dhe komisionerët publikë do të bëjnë intervista.

Për sa i përket shqetësimit të zotit Bylykbashi, se Avokati i Popullit mund të ketë shtuar kandidatë...

(Ndërhyrje pa mikrofon.)

Më vjen keq, por me sa kuptoj, nuk e keni filluar studimin e dosjeve. Unë e kam filluar studimin e dosjeve dhe dokumentacioni që ka sjellë Avokati i Popullit përmban komunikimin zyrtar për një kandidat që nuk ka plotësuar kriteret formale, dhe ONM-ja e ka quajtur që i plotëson, duke i renditur dhe thënë se në dosje mungojnë dëshmia e penalitetit, vërtetimi nga Autoriteti i Verifikimit të Dosjeve apo vërtetimi i punës që nxjerr vjetërsinë, e të tjera, dhe thotë: “Ju lutem, brenda një ditë të caktuar, dorëzoni dokumentet”, të cilat i ka marrë sërish me procesverbal dorëzimi, që secili nga ne i ka në dosje.

Të gjitha këto që thoni ju, i keni në dosjen e çdo kandidati. Pra, nuk ka nevojë t’i themi Avokatit të Popullit të na sjellë dokumentacion si i shtoi, sepse janë te secili me procesverbal.

Për të mos humbur kohë, sepse studimi i dosjeve merr shumë kohë, të paktën 4-5 dosje donin minimumi 1 orë nga prova që kam bërë me studimet e dosjeve të para, të vendosim sot, secili të shkojë në zyrën e vet dhe të vazhdojë studimin e dosjeve.

Faleminderit!

Ulsi Manja – Faleminderit, zonja Hysi!

Urdhëroni, zoti Mediu!

Fatmir Mediu – Është e panevojshme të bëjmë debat, sepse ligji e ka përcaktuar rrugën si do të zhvillohet procedura, që duhet të ketë një seancë dëgjimore. Jemi përballë faktit që duhet të bëjmë seancën dëgjimore dhe mendoj se sekretariati duhet të marrë disa angazhime konkrete që kjo seancë dëgjimore të jetë e vlefshme.

E para, duhet t’i përcjellë çdo kandidati të gjithë dokumentacionin mbi bazën e të cilit është skualifikuar nga Avokati i Popullit.

(Ndërhyrje pa mikrofon.)

Argumenti bazohet mbi një dokumentacion.

E dyta, për të ecur më tej, për t’i paraprirë punës në seancën dëgjimore, që të mos kemi vetëm diskutime pa fund, do të ishte mirë që të gjithë kandidatët e skualifikuar, që pretendojnë të vijnë në seancën dëgjimore, të përcjellin pretendimin e tyre me shkrim në këtë komision, që edhe ne të kemi njohje paraprake dhe të mos kemi ballafaqim vetëm në momentin e seancës dëgjimore. Kjo do të na ndihmonte të kishim një gjykim më të drejtë jashtë seancës dëgjimore për të pasur mundësinë për të votuar për kalimin nga lista negative në listën pozitive.

Më tej do të vazhdojmë me kandidatët e tjerë. Të bëjmë përgatitjet për seancën dëgjimore, sepse kjo është shumë e rëndësishme për të gjithë ata që janë skualifikuar.

Më pas të kalojmë në diskutime për listën ose për elementet që diskutoi zoti Bylykbashi.

Ulsi Manja – Po, zoti Noka.

Flamur Noka – Zoti kryetar, komisioni ynë është bazë, ai ka volumin dhe ngarkesën kryesore në të gjitha komisionet e vetingut. Sigurisht që ne kemi një *deadline* dhe do të bëjmë gjithçka për ta përmbushur detyrën dhe punën tonë brenda afatit kushtetues. Por, si institucion kushtetues i vetingut, si institucion parlamentar, ne nuk mund të pranojmë të kalojmë lista pa i njohur, pa i ditur. Jemi të prirur të besojmë edhe në korrektesën e vlerësimit dhe të punës edhe të Avokatit të Popullit, edhe të ONM-së, por në bazë të nenit 8 të ligjit “Për rivlerësimi kalimtar të gjyqtarëve dhe prokurorëve në Republikën e Shqipërisë”, do të kalojmë në seancë dëgjimore të gjithë kandidatët.

Sigurisht, mund të mos kemi të drejtë t’i rrëzojmë kandidatët që kanë marrë vlerësimin pozitiv nga Avokati i Popullit, por duhet të njohim secilin kandidat. Në rast se nuk do të ishte e nevojshme që ne t’i konsultonim apo t’i dëgjonim, të njiheshim me këto kandidatura, ligji nuk do të parashikonte që kjo liste të na vinte neve, por automatikisht do të parashikohej t’u kalonte dy komisioneve të votimit.

Për sa kohë që kjo listë na ka ardhur neve, sigurisht që do të zhvillojmë seancën dëgjimore.

E para, do të votojmë për kandidatët e dy listave të tjera në rast se plotësojnë kriteret formale dhe mund të jenë skualifikuar gabimisht.

E dyta, e çmoj shumë të rëndësishëm skandalin e publikimit të listave të kandidaturave në mediet afër pushtetit. Ky është një skandal dhe tregon se ende pa e filluar mirë punën komisionet e vetingut, nga pushteti, nga maxhoranca rrjedhin apo dekonspirohen qëllimisht informacionet që mund të jenë edhe sekrete. Është e turpshme për ne që kandidatët, qoftë ata që kanë marrë vlerësime pozitive nga Avokati i Popullit apo ONM-ja, qoftë ata që kanë marrë vlerësime negative, të marrin vesh nga mediet e pushtetit se çfarë ka ndodhur me fatin dhe karrierën e tyre në këtë proces. Është shumë e rëndë dhe e turpshme. Unë e dënoj këtë akt të turpshëm dhe ju bëj thirrje juve si maxhorancë dhe juve si pushtet, të merrni masa që të mos dekonspirojmë problematika të tilla, sepse kështu i vëmë minat këtij procesi, për të cilin, me kaq mund dhe sakrific ne e kemi ngritur dhe po mundohemi ta shtyjmë para për të mirën e drejtësisë në vend dhe për të mirën e këtij vendi.

Faleminderit!

Ulsi Manja – Po, zonja Hysi.

Vasilika Hysi – Në fakt, zoti Noka, ata që duhet të shqetësohen për publikimin e listave jemi ne, maxhoranca, që dje këmbëngulëm fort dhe kemi bërë një debat të madh, që lista e kandidatëve që ka marrë një vlerësim negativ nga Operacioni Ndërkombëtar i Monitorimit nuk duhet të dalë në media, por duhet t’i jepej personalisht çdo individ, për t’u ruajtur atyre

dinjitetin dhe integritetin. Për aq kohë sa ne jemi komisioni, i cili do të bëjë verifikimin dhe jemi komisioni përgjegjës, që, nëse pas intervistës do e gjenim të papërshtatshëm rekomandimin e Operacionit Ndërkombëtar të Monitorimit, ta fusnim në listë ose, në qoftë se do ta gjenim të papërshtatshëm vlerësimin që ka bërë Avokati i Popullit lidhur me kriteret formale, do t'i kalonim në listën për votim me votat tona. Ishit ju, dhe për këtë lexoni procesverbalet, ku dje deklaruat që do të bënit transparencën dhe do t'ia jepnit listën medias, sepse ky duhet të jetë proces i hapur dhe transparent. Meqenëse jemi komision, që deri diku kemi rolin e kolegjit të apelimit për njerëzit që janë përjashtuar nga listat, i kemi këtu nëpërmjet dëgjimit të një procesi të rregullt ligjor, duke i thirrur, dëgjuar dhe duke i votuar së bashku me katër ose pesë vota. Se sa i rëndësishëm është ky proces, e kemi treguar ne, që luftuam fort dhe jo ju që e shtytë këtë proces deri në këtë ditë. Ndërkohë që parlamenti ka mbyllur sesionin parlamentar dhe ka filluar fushata, ne të gjashtë këtu duhet të lëmë fushatën dhe të bëjmë këtë lloj procesi dhe t'i japim fund kësaj zgjatjeje me kandidaturat, sepse edhe për ata nuk është mirë që të rrinë pafundësisht të presin se kur do të mbledhet Kuvendi dhe ta mbyllim këtë proces sa më shpejt.

Prandaj, t'i lëmë këto lloj akuzash, sepse nuk ju shkon, të lexojmë procesverbalin e djeshëm dhe të shikojmë se kush tha që t'i çojmë në media brenda ditës së djeshme, pastaj të fillojmë sa më shpejt procesin.

Faleminderit!

Flamur Noka – Më fal, kryetar.

Gjatë kohës që kolegja do të lexojë procesverbalin, duhet të jemi korrektë. Ne saktësisht u përkasim kaheve të ndryshme politike këtu, por[, mbi të gjitha, jemi përfaqësues të popullit dhe nuk mundemi të sajojmë gjëra të tilla të paqena. Pse? Sepse, absolutisht, opozita dhe Partia Demokratike, kryesisht, kanë qenë dhe janë për një transparencë të plotë të të gjithë këtij procesi.

Pikë së pari, këtë transparencë ia kemi detyrë vetes tonë, integritetit tonë personal, qytetarëve që na kanë votuar dhe ligjit. Në qoftë se ju kërkesën për transparencë e quani shitblerje të informacionit, më vjen shumë keq, zonja Hysi, por kjo është çështja juaj. Në rast se unë si opozitar apo kundërshtar ia paskam çuar gazetës “Tema” informacionin... Nëse gjeni ndonjë shqiptar në këtë vend që e beson se Flamur Noka u ka çuar gazetave të pushtetit informacionin... Flamur Noka po të donte të shiste informacionin, ka gazetën e partisë së tij. Të vetmen media që ka Partia Demokratike dhe opozita sot, është vetëm gazeta “RD” dhe informacionin ia kisha çuar asaj dhe jo mediave të pushtetit.

Ulsi Manja – Mos bëj reklamë, zoti Noka, por përqendrohuni te problemi.

Flamur Noka – Po të mendoni se unë u paskam çuar mediave të pushtetit informacionin...

Përsërite edhe një herë që ta dëgjojnë qytetarët, sepse jam dakord dhe vij e pranoj.

Faleminderit!

Ulsi Manja- Faleminderit, zoti Noka!

Zoti Bylykbashi, e ka fjalën.

Oerd Bylykbashi – Zoti kryetar, ndërkohë që mbështes zotin Noka në lidhje me çështjen e transparencës, unë e thashë edhe më parë se kjo është detyrë që duhet ta bënte Kuvendi, jo tani, por më parë, prandaj fillojnë çështje të këtij lloji që po diskutojmë këtu. Është e drejta e kandidatëve të vijnë dhe duhej të ishte bërë më parë, përfshirë atë që thotë ONM-ja, por kjo është histori tjetër dhe ne duhet të bëjmë kujdes për të vazhduar më tej, sepse ka edhe informacione të detajuara për to, por kjo nuk është çështja kryesore.

Dua të rikthehem te diçka tjetër. Mbi bazën e ligjit ne kemi për detyrë që të çojmë për votim të mëtejshëm te komisioni që do të shtypin një buton, listën që përmban kandidatët, të cilët plotësojnë kriteret formale. Duke qenë një komision që bën verifikimin e kandidatëve dhe nuk bën ndonjë kufizim titulli se për çfarë lloj kandidatësh të listës A, B, C apo Zh, ne duhet të sigurohemi që kandidatët shkojnë të gjithë të saktë. Për këtë na duhet që të marrim masa, të kemi të gjithë informacionin, duke prezumuar që të tjerët kanë bërë punën e tyre, ne bëjmë punën tonë. Kaq e thjeshtë. Kërkoja informacionin, si sekretariat Avokatit të Popullit dhe ONM-s për motivet e skualifikimit, në mënyrë që ne të jemi në gjendje të bëjmë vlerësimin tonë kur të ngremë dorën me 4 apo me 5 vota. Nëse ky komision do të vendoset në kushtet e mungesës së informacionit, por vetëm të një informacioni tabelar, ku mund të thuhet: “përvojë gjerësisht e pamjaftueshme apo mungesë e konsiderueshme dokumentesh” ky është një informacion i pamjaftueshëm për mua si deputet dhe për kolegët për të marrë një vendim dhe jemi në kushtet që nuk votojmë dot, pra do të votoja pro ose kundër kot. Duke qenë se jam dakord me zotin Noka, që ne nuk jemi këtu vulos vullnetesh të tjerësh, por kemi një detyrë kushtetuese për të bërë, për këtë e ripërsëris, para se ky komision që mbi bazën e ligjit dhe të Rregullores së Kuvendit, duke qenë organ kolegjal dhe ka një numër mekanizmash, përfshirë vendimmarrjen, të cilësuar kur kërkohet, ne duhet të jemi në gjendje që ta bëjmë këtë vlerësim duke marrë informacionin, duke ditur pse një grup kandidatësh një herë nuk bënë dhe herën e dytë bënë. Ne lexojmë edhe dosjen, kolegja ka lexuar 5 dosje, deri në fund të ditës mund të lexoj 7, nuk është kjo çështja. Kështu që mblidheni këtë informacion, na duhet që të bëjmë vlerësimin e duhur, gjithashtu atë që tha zoti Mediu, pra përpiquni të merrni konfirmimin e atyre që janë të skualifikuar, nëse duan apo nuk duan ta vazhdojnë këtë proces, në mënyrë që

ne, nëse ata nuk duan dhe janë të skualifikuar, të mos konsumojmë kohën e Kuvendit, të këtij komisioni, me seanca dëgjimore, të cilat do të jenë bosh.

Vasilika Hysi – Jam dakord zoti Bylykbashi që në njoftimin individual, që do t’i bëhet çdo kandidati të skualifikuar për intervistë, të pyetet dhe t’i thuhet vetëm atij arsyeja, pra personat e skualifikuar që nuk plotësojnë kriteret formale ose kanë rekomandim negativ nga OMN-ja. Por në dosje ka informacion të detajuar, për shembull, kur OMN-ja ka thënë: “përvojë e pamjaftueshme”. Kur studion një dosje “përvojë e pamjaftueshme”, është sepse nuk plotëson kriterin 15 vjet jurist.

(Ndërhyrje pa mikrofon.)

Po e nxjerrim ne nga studimi i dosjes.

Të lutem, zoti Noka, të mbaroj!

(Ndërhyrje pa mikrofon.)

Zoti Noka, tani po bini në kundërshtim me atë që po thoni vetë. Komisioni ynë quhet Komisioni i Verifikimit të Kriereve, prandaj kemi lënë 6 ditë që të verifikojmë. Detyra jonë është që çdo dokument dosjesh, i fotokopjuar nga stafi i Kuvendit, ta hapim dhe ta shikojmë. Prandaj dje u kërkua edhe këshilltarëve ta bëjnë këtë tabelën, që secili të bëjë shënimet e tija. Për shembull, në një dosje, në qoftë se zoti Bylykbashi, nuk e kam të qartë për vlerësimin e OMN-së, kur thuhet: “përvojë e pamjaftueshme”, po ishte e qartë se një kandidat X nuk ka përvojë të mjaftueshme, sepse nuk kishte punuar jurist, për shembull, kishte punuar inxhinier.

(Ndërhyrje pa mikrofon.)

Jo, jo, ju thoni që t’i kërkojmë Avokatit të Popullit dokumente, jo nuk duhet, sepse i ka sjellë të gjitha në dosje.

(Ndërhyrje pa mikrofon.)

Jo i kemi në dosje. Ju lutem, shikoni dosjet, sepse i keni në dosje këto që po kërkon!

Flamur Noka – Më fal, zoti kryetar, mund të jesh partiakë dhe e pasionuar, por këtu duhet...

(Ndërhyrje pa mikrofon.)

Vasilika Hysi – Zoti Noka, i keni në dosje për secilin. Ato që kanë munguar i kanë sjellë në datën kaq, në orën kaq. I ka marrë në dorëzim A-ja dhe B-ja. Ju lutem, hapini dosjet dhe shikojini!

Flamur Noka – Të lutem, uleni pasionin!

Ulsi Manja – Zoti Noka, të lutem, ke gjë për të shtuar për këtë proces?

Flamur Noka – Po, kam, zoti kryetar.

Në mbledhjen e parë, me sa kujtoj dhe nuk besoj se jam i gabuar, sepse fal Zotit kujtesën e kam të mirë, ne vendosëm që Avokatit të Popullit dhe OMN-së t'i dërgojmë një shkresë zyrtare në emër të komisionit për të na plotësuar me dokumente të gjitha arsyet që, për fat të keq, të ishin të paraqitura në të thatë, për skualifikimin e një tërësie emrash apo një numri shumë të madh të pretendenteve për të qenë kandidatë.

Ju lutem, edhe një herë, ia kërkon, gjeni një rrugë tjetër, më të shpejtë, të kontaktoni përsëri, me anë shkresore ose në rrugë telefonike, me këto dy institucione që të na mundësojnë që deri ditën kur do të lëmë seancën dëgjimore ta kemi këtë informacion, sepse ditën që ne do të kemi kandidatët këtu në seancat dëgjimore, duhet të kemi të gjithë dokumentacionin e plotë dhe jo me shprehje të thata, ashtu siç na kanë ardhur, sepse nuk jemi në gjendje të gjykojmë dhe më pas do ta kemi të pamundur të japim gjykim objektiv dhe real. Kjo ishte kërkesa e parë.

Kam edhe një kërkesë të dytë. Çdonjëri prej nesh këtu është deputet sot. Jemi njerëz politikë. Kjo është një periudhë fushate. Ne gjatë gjithë ditës do të jemi në fushatë. Prandaj unë propozoj që të gjitha seancat t'i zhvillojmë darkave, natën, deri në mëngjes, sepse unë gjatë ditës jam në fushatë, zonjë. Unë nga mëngjesi deri në darkë jam në fushatë. Jam i gatshëm të rri nga darka deri në mëngjes të bëj detyrën këtu, por do të bëj edhe detyrën time atje ndaj qytetarëve. Prandaj seancat dëgjimore, të gjitha mbledhjet e këtij komisioni propozoj t'i bëjmë pas orësh 20:00 deri në mëngjes. Jemi krejt të hapur të punojmë, por pas orës 20:00, sepse deri në këtë orë jemi në fushatë.

Faleminderit!

Ulsi Manja – Besoj se nuk ka sqarime të tjera nga kolegët.

Në cilësinë e kryetarit të këtij komisioni, për të qenë transparent me mediet, por edhe me publikun, dua të jap edhe unë konsideratat dhe mendimet e mia lidhur me këtë proces kaq të pritur për shqiptarët.

Së pari, baza e veprimtarisë së këtij komisioni sipas Kushtetutës dhe ligjit, por edhe procedurave të miratuara në Kuvendin e Shqipërisë janë transparenca, informimi dhe ruajtja e konfidencialitetit. Unë nuk jam në gjendje dhe nuk është detyra ime të di se cilat medie janë afër pushtetit dhe cilat janë kundër, por...

Flamur Noka – Ta them unë: kundër pushtetit janë gazetat “Rilindja demokratike” dhe “55”, të gjitha të tjerat janë pro.

Ulsi Manja – Të lutem, mos ndërhy, të lashë dhe fole sa deshe!

Dje në mbledhjen e këtij komisioni, për të ruajtur integritetin e kandidatëve që marrin pjesë në këtë proces, u kam kërkuar kolegëve të jenë të kujdesshëm në komunikimin me mediet. Gjithsesi, unë nuk besoj se publikimi, që i është bërë listës së kandidatëve në medie, nuk e

cenon konfidencialitetin dhe integritetin e kandidatëve që janë bërë pjesë e këtij procesi. Ndoshta ky shqetësim është një mënyrë reflektimi për punën në ditët në vazhdim të këtij komisioni. Për këtë duhet të biem dakord në këtë komision.

Lidhur me atë që u parashtrua këtu, nuk duhen ngatërruar kompetencat dhe detyrat e këtij komisioni të Kuvendit me detyrat dhe kompetencat e institucioneve të tjera aktore në procesin e rivlerësimit të gjyqtarëve dhe prokurorëve në Republikën e Shqipërisë. Detyrat dhe kompetencat e Avokatit të Popullit në këtë proces i ka përcaktuar Kushtetuta dhe ligji i vetingut. Po ashtu edhe detyrat, edhe kompetencat e Operacionit Ndërkombëtar të Monitorimit i kanë përcaktuar Kushtetuta dhe ligji. Ky komision është për vlerësimin e kandidatëve që janë pjesë e kësaj gare.

Dosja dhe dokumentacioni i secilit kandidat është dorëzuar në Kuvendin e Shqipërisë dhe ju, të nderuar kolegë, i keni të gjitha mbi tavolinë. Pra, vlerësimi i këtij komisioni dhe vendimmarrja e tij do të bazohen në dokumentacionin e ardhur dhe në seancën dëgjimore që ky komision e ka detyrim kushtetues dhe ligjor për të zhvilluar me secilin prej kandidatëve.

Ajo që unë ju kam propozuar në draftkalendarin që keni përpara, është e thjeshtë dhe duhet të behet e ditur edhe për publikun. Kemi 193 dosje për 193 kandidatë që kanë marrë pjesë në këtë garë. Sipas sekretariatit teknik rezulton se dy nga kandidatë janë tërhequr nga gara. Pra, kemi 191 kandidatë të grupuar në dy lista: lista A, që është lista e kandidatëve që plotësojnë kriteret formale dhe ku janë 84 kandidatë, ku 17 prej të cilëve kanë marrë një rekomandim negativ nga ONM-ja; lista B, që ka 109 kandidatë të cilët nuk i plotësojnë kriteret formale, ku 70 prej tyre kanë marrë një rekomandim negativ nga ONM-ja dhe 39 prej tyre kanë marrë vlerësim pozitiv nga ONM-ja.

Lidhur me zhvillimin e seancave dëgjimore, konform nenit 8 të aneksit kushtetues, nenit 8 të ligjit “Për rivlerësimin kalimtar të gjyqtarëve dhe të prokurorëve” dhe saktësisht nenit 8 të vendimit të Kuvendit, që përcakton procedurat e punës së këtij komisioni *ad hoc*, unë i propozoj këtij komisioni që kandidatët e listës B të njoftohen të gjithë për seancë dëgjimore. Ndërsa te lista A, siç e përcakton ligji, të njoftohen kandidatët që kanë marrë një rekomandim negativ nga ONM-ja dhe komisioni, në proces e sipër të punës, këtu jemi, do të vendosim edhe për seancën dëgjimore, edhe me pjesën tjetër të kandidatëve që kanë marrë rekomandim pozitiv edhe nga Avokati i Popullit, pra që plotësojnë kriteret formale, dhe rekomandim pozitiv nga ONM-ja, të cilët që në këtë fazë janë pjesë e listës për votim. Unë këtë propozoj.

Kush është dakord me këtë draft dhe me këtë propozim që ju keni përpara? Besoj se biem dakord për këtë.

(Ndërhyrje pa mikrofon.)

Sigurisht që i përfshijmë të gjithë, por duke filluar me këtë radhë: kandidatët e listës B dhe kandidatët që kanë marrë rekomandim negativ nga ONM-ja, ndërsa Sekretariati Teknik, sipas grupimit në dy datat që janë lënë për seanca dëgjimore, të marrë masa që në adresën elektronike të secilit prej kandidatëve të bëjë njoftimin për pjesëmarrjen në seancë dëgjimore me konfirmim pjesëmarrjeje, duke u bërë me dije edhe arsyen e moskualifikimit, sipas shpjegimeve që janë dhënë në listat A dhe B.

(Ndërhyrje pa mikrofon.)

Po edhe në listën C.

Pra, secili nga kandidatët që do të jetë pjesë e seancës dëgjimore duhet të jetë vënë në dijeni lidhur me skualifikimin ose mosbërjen pjesë të listës A...

(Ndërhyrje pa mikrofon.)

Sepse ky komision, në përfundim të kësaj seance dëgjimore, ka të drejtën që me një vendimmarrje katër për kandidatët që nuk plotësojnë kriteret formale, por që nuk kanë marrë rekomandim negativ nga ONM-ja, mund t'i bëjë pjesë të listës për votim, dhe me një votim prej pesë votash mund të vendosë që kandidatët që plotësojnë kriteret formale, pra që janë te lista A dhe që kanë marrë një rekomandim negativ nga ONM-ja, të qëndrojnë pjesë e kësaj liste.

Kjo është detyra e këtij komisioni dhe këtë na e ka ngarkuar ligji dhe Kuvendi i Shqipërisë për ta kryer brenda një afati kushtetues në maksimum prej dhjetë ditësh, por duke qenë se jemi në një fushatë zgjedhore, njëkohësisht është edhe një detyrë kushtetuese e ngarkuar nga Kuvendi i Shqipërisë, unë u kam propozuar kolegëve të këtij komisioni që ky proces të përmbyllet në një kohë sa më të shkurtër të mundshme, por që kërkon nga secili prej nesh të punojmë, ashtu siç tha kolegu Noka, me dosjet e kandidatëve, të cilat i keni secili në zyrë, që t'i japim kohë vetes dhe procesit për ta përmbyllur në afatin dhe në kohën e përcaktuar, për t'ia përcjellë listën e kandidatëve të dyja komisioneve të tjera *ad hoc* të Kuvendit të Shqipërisë, ku edhe në ato dy komisione pothuajse jemi të gjithë ne anëtarët e komisionit që jemi në Komisionin e Verifikimit të Mandateve.

Unë besoj se jam i qartë në këtë që propozoj.

(Ndërhyrje pa mikrofon.)

Unë kam propozuar datën 29, ora 10:00, që i bie ditë e hënë, dhe ditën e martë, përsëri në orën 09:00, pra në një orë më përpara që të kemi kohë ta përmbylлим këtë proces në orën 09:00 të datës 30.

Por, ju lutem, sekretaria, në njoftimin që do t'u bëni kandidatëve që sot për seancat dëgjimore, t'ua kërkon pjesëmarrjen me konfirmim, në mënyrë që komisioni *ad hoc* të

racionalizojë kohën e seancave dëgjimore, pasi kemi të bëjmë me një numër mjaft të madh kandidatësh, që duhet t'i nënshtrohen këtij procesi dëgjimi.

(Ndërhyrje pa mikrofon.)

Biem dakord me...?

Vasilika Hysi – Më falni!

Ulsi Manja – Po, ju lutem!

Vasilika Hysi – E kam ndërhyrjen për arsye procedurale.

(Ndërhyrje pa mikrofon.)

Ulsi Manja – Po, mund të largoheni!

(Ndërhyrje pa mikrofon.)

Vasilika Hysi – Zoti kryetar,

Sot u zhvillua një mbledhje ku u konstituua Komisioni për anëtarët e Kolegjit të Apelimit, ku jemi bashkë, zoti Noka, dhe u la që ne, anëtarët e dy komisioneve të përzgjedhjes, që do të votojmë nëpërmjet sistemit elektronik, do të trajnohem në orën 09:00 me 10:00 të ditës së hënë. Pasi të instalohen aparaturat, softwer-i, e të tjera...

Ulsi Manja – Zonja Hysi, të lutem!

Flamur Noka – Kjo nuk ka lidhje me punën e këtij komisioni.

Ulsi Manja – Nuk ka lidhje me punën e këtij komisioni.

Vasilika Hysi – Më fal! Nuk mund ta shtyjme.

Zoti kryetar, propozimi i zotit Noka që të mblidhemi në orën 20:00, nuk është serioz. E para kjo.

Ulsi Manja – Propozimin i zotit Noka ishte për konsum mediatik.

Flamur Noka – Jo, jo, e kam seriozisht.

Ulsi Manja – Ju lutem, mos harxhoni kohën me këto gjëra, sepse nuk janë pjesë e punës së këtij komisioni.

Vasilika Hysi – Së dyti, meqenëse u lamë detyrë këshilltarëve të bëjnë njoftimet, do të ishte mirë që nëpërmjet medias të përcillet mesazhi që të hënë dhe të martën do të zhvillohen seanca dëgjimore. Njoftimi i kandidatëve po bëhet me e-mail, por mund të ketë edhe nga ata që nuk e hapin e-mail-in dhe ikin me pushime.

(Flamur Noka flet pa mikrofon)

Ulsi Manja – Zoti Noka, ju lutem të mos merremi me gjëra që nuk i përkasin punës së këtij komisioni *ad hoc*.

Pra, propozohet dita e hënë në orën 10:00, për shkak se në orën 09:00 do të bëhet një trajnim për mënyrën e votimit me pajisje elektronike, që e tha edhe kolegja Hysi. Gjithsesi, është pjesë që i përket punës së atij komisioni.

Në mënyrë që të jemi të qartë për opinionin publik, mediat, por edhe për kandidatët që janë pjesë e kësaj gare, të cilët do t'i nënshtrohen procesit të verifikimit në këtë komision, të bëhet njoftimi i kandidatëve të listës “b”, të kandidatëve të listës “a”, të cilët kanë marrë një rekomandim negativ nga ONM-ja, me adresë elektronike si dhe me njoftim publik për t'u paraqitur në seancë dëgjimore, por njoftimi të jetë me konfirmim.

Kjo seancë është një njoftim publik. Në datat 29. 05. 2017 dhe 30.05.2017, respektivisht, në orën 10:00 dhe 09:00 të paradites, të gjithë kandidatët që do të marrin njoftimin për seancë dëgjimore, duhet të paraqiten pranë këtij komisioni.

Ky njoftim vlen përpos njoftimit që do të bëhet në postën e elektronike të gjithsecilit.

Kështu që, besoj...

(Ndërhyrje pa mikrofon)

Mënyra si do të zhvillohen seancat dëgjimore do të vendoset ditë e hënë nga komisioni.

(Ndërhyrje pa mikrofon)

Flamur Noka – Më fal, ...

Ulsi Manja – Jo, nuk është fjala për të mbyllura. Është një vendim që e merr ky komision, për shkak se, e thashë që në fillim, baza e veprimtarisë dhe punës së këtij komisioni është transparenca, informimi, por edhe konfidencialiteti i gjërave që do të diskutohen në seancën dëgjimore...

Flamur Noka – Zoti kryetar, më fal!

Ulsi Manja – Të lutem, zoti Noka!

Flamur Noka – E kam shumë sinqerisht.

Ulsi Manja – Të mirëkuptoj për shqetësimin që ke.

Flamur Noka – Të tutem!

Unë nuk e thashë për konsum politik apo mediatik, por me bindje të plotë.

Zotëri!

Në rast se gjatë ditës ju keni kohë të rrini këtu, rrini, është puna juaj, por duke filluar nga dita e shtunë në darkë, kur Partia Demokratike hap fushatën, unë dhe kolegët Bylykbashi dhe Mediu, gjatë ditës nuk kemi asnjë minutë kohë për t'u marrë me këtë punë. Shprehim gatishmërinë tonë të punojmë gjithë natën deri në mëngjes.

Ditën do të punojmë për t'ju rrëzuar ju, kurse natën do të studiojmë dosjet dhe dëgjojmë të gjithë kandidatët. Kjo është detyra jonë, ditën kemi detyrë partiake, natën kemi detyrë kushtetuese. Jemi dakord të punojmë, por nuk mund ta vendosni ju orën.

Ulsi Manja - Ju lutem!

Flamur Noka – Pika tjetër që kam është se e lamë të kalojnë në seancë dëgjimore të gjithë kandidatët, pa përjashtim.

Ulsi Manja - Ju lutem!

Flamur Noka- Të përcaktojmë orarin, sepse nuk mund...

Ulsi Manja - Në seancë dëgjimore do të fillojmë me listën B dhe me pjesën e listës A...

(Ndërhyrje pa mikrofon)

Më falni, ju lutem!

E lamë që seanca dëgjimore do të vazhdojë siç e ka ligji dhe procedura e miratuar me të gjithë kandidatët e listës B, që janë 109 kandidatë dhe me kandidatët e listës A, që kanë marrë një rekomandim negativ nga ONM-ja. Nëse komisioni do të çmojë që do të thirret në seancë dëgjimore edhe pjesa tjetër e listës prej 67 kandidatësh...

(Ndërhyrje pa mikrofon)

A doni t'i dëgjojmë të gjithë? Të gjithë do t'i dëgjojmë.

(Ndërhyrje pa mikrofon)

Flamur Noka – Njoftojini të gjithë! Ndajini!

Ulsi Manja - Po i kemi ndarë. Por ky komision do ta përmbyllë detyrën e vet respektivisht në këto dy data që kemi përcaktuar në kalendar.

Flamur Noka- Pa diskutim, jemi të gjithë dakord.

Ulsi Manja - Sepse vërtet jemi në fushatë elektorale, por gjëja më e rëndësishme që qytetarët shqiptarë presin nga ky komision, dhe dy të tjerat në respekt të atij votimi që u bë në Kuvend, është përmbyllja me sukses e procesit të vetingut. Unë besoj se në dy ditë është kohë më se e mjaftueshme dhe nuk besoj se e cenojmë atë shqetësim që ju keni për ta përmbyllur këtë proces dhe për të qenë të lirë për të vazhduar aktivitetin tonë politik.

Unë nuk besoj se gjatë asaj lodhjeje të fushatës ditën, natën mund të nxjerrim dhe të bëjmë punë të mira.

Flamur Noka- Kjo është individuale, zoti kryetar, se nuk dua t'i hyj kësaj. Unë punoj edhe ditën, edhe natën dhe nuk e kam fare problem.

Çështja është shumë e thjeshtë, ne nuk duhet të pengojmë veten tonë nga punët e përditshme. Po them të vazhdojmë punët tona ditën dhe jam gati të rrimë gjithë natën dhe të bëjmë detyrimin kushtetues që kemi.

Ulsi Manja - Ju lutem, zoti Noka, ta mbyllim, sepse jemi të qartë.

Vasilika Hysi – A doni një përgjigje nga unë? Me çadrën 90 ditë e bllokuat vetingun. Tani do të hapim historinë?

(Ndërhyrje pa mikrofon)

Flamur Noka- Jemi absolutisht dakord ta mbyllim në datën 10. Jemi absolutisht dakord të punojmë të gjithë natën, sepse ju... A doni ju ta bëjmë natën ditë e ditën dritë që ta përmbyllim?

Ulsi Manja -Ju lutem, ky komision brenda afatit të caktuar kushtetues do të prodhojë një listë votimi për dy komisionet e tjera, siç e përcaktuam në axhendën e miratuar sot.

Ju lutem, këtu mbyllet komisioni. Ditë të mbarë!

Oerd Bylykbashi- Ju lutem, një fjalë vetëm kisha!

Ti ke hallin e vetingut, ne kemi hallin e vetingut, kështu që a ka mundësi t'i japim drejtim kësaj pune shpejt dhe të mos e zgjasim?

Ulsi Manja - Ja pra, mënyra më e mirë për t'i dhënë fund kësaj pune, është kjo që miratuam sot.

Faleminderit!

MBYLLET MBLEDHJA